

# ABIADURA HANDIKO TRENA (AHT) GELDITZEKO MANIFESTAZIOA OTSAILAREN 1-EAN TOLOSAN

Datorren otsailaren leian, larunbatarekin, Abiadura Handiko Trenari oposizioa erakusten dioten hainbat talde eta erakunderen arteko AHT GELDITU! Elkarlanak manifestazioa deitu du Tolosan, AHT gelditu beharra aldarrikatzeko eta bere justifikazio faltagatik nahiz eragingo lituzkeen kalte ekologiko, sozial eta ekonomikoengatik, baita nekazaritzari eta lurraldearen orekari eragingo lizkiekeenengatik ere, gaitzespen zabala jaso duen makro-proiektu horren inposaketa arbuizatzeko. Eusko Jaurlaritzak eta Espainiako Sustapen Ministerioak AHTren auzian agertzen duten intransigentzia dela eta, deialdi berezia egin nahi diegu, gainera, AHTri oposizioa erakusten dioten jende eta erakunde guztiei **“AHT GELDITU! INPOSAKETARIK EZ!”** lelopean egingo den manifestazio horretan parte hartzeko, **arratsaldeko 6etan Tolosako Triangelu Plazatik abiatuta**. Mobilizazio indartsu bat bultzatu behar dugu Eusko Jaurlaritzaren inposatze egitasmoari aurre egiteko eta AHTk, inoiz gauzatuko balitz, arlo sozialean nahiz ingurugiroan eragingo lituzkeen ondorioen larritasunari buruz erabateko desinformazioaz baliatuta kostatuta ahala kostatuta ezarri nahi zaigun garraio eta gizarte ereduari dagokionean eztabaida zabal eta eraldaketa sakon bati ekin behar zaiola aldarrikatzeko.

Garraio azpiegiturak giltzarri dira bizi nahi dugun herri ereduarentzat. AHTren gaia dela eta –egituragatik “Y” izenarekin ezaguna dena eta Iruñea / Zaragozarekin duen adar nafarra–, bistakoa da garraio sistema horrek, ingurugiroan eragindako kalte izugarriekin batera, ikaragarri garestia eta lurralde nahiz gizarte ikuspegitik arras diskriminatzailea dela. Gainera, AHTren proiektua modu inposatzailean bultzatu da, administrazioko organo erabakitzaileen eta herritarren artean leizea zabaldua eta udalerrri kaltetuen iritzia mesprezatuta. Aldi berean, AHTren afera dela eta indar politikoen artean izan diren azpijokoez eta adostutako diferentziek egungo sistema parlamentaristak dituen muga geroz eta nabarmenagoak agerian jarri baino ez dute egin. Ez da harrizkoa, beraz, euskal gizarteak jende askok AHT zalantzan jartzea eta proiektu hori interes orokorrekoa dela gezurtatzea. Izan ere, herrien, eskualdeen eta gizartearen interes orokorraren gainetik hemengo eta hango gobernuak kapital handiaren interesei ematen dieten lehentasunaren adibide gordina da AHT, energia plan erraldoiak, superportuak eta pareko beste zenbait azpiegitura lan erraldoi bezala. Hortaz, inolaz ere gauzatu behar ez den eta erabateko larritasuna duen egitasmo baten aurrean gaude. Bestetik, gure herriak bere osotasunean jasango duen arazo bat izatea, bere larritasuna erakusteaz gainera, oposizioa antolatzeke orduan eragingarri suerta daiteke.

Gogor salatu behar dugu Eusko Jaurlaritzaren jarrera, Ibarretxe Planaren markoan “euskal Y”a delako egitasmoaren inposaketa azkartzeko erabaki larria hartu baitu, euskal gizarteak AHTren aferan dagoen desadostasun nabaria aintzat hartu gabe. Bere esanetan, AHTk ezin omen du gehiago itxaron, baina nahikoa suntsitua dagoen euskal bizilurrak ere ezin dezakeela luzaroan itxaron guztiz ahaztuta dago, are itxurazko “garapen sostengarri” baten izenean bultzatzen dituen beste hainbat azpiegitura egitasmo erasokor eta zentzugabek mehatxatua dagoenean. Gertaera honek Euskal Gobernuak lehenesten dituen klase interesak uzten ditu agerian, gure herriaren premia sozialei inolaz ere erantzuten ez dien makro-proiektu baten aurrean baikaude.

Ondorioz, herritarrek eta udalerrri kaltetuek proiektuarekiko azaldu duten arbuioa errespetatua izan dadin, lokal mailako beto eskubidea onartu dadila eskatzen dugu, azpiegitura honek edota interes lokal kolektiboan aurka jo dezakeen beste edozeinek eragindako herrietan beren erabaki propioak hartzeko ahalmena izan dezaten. Ildo honetan, AHTren proiektuko lan geoteknikoak eragozteko azken hilabeteotan egiten ari den oposizioa ontzat ematen dugu. AHTri oposizio tinkoa erakusten dioten hainbat herritan lan horiek geldiarazi egin dituzte.

Hori denagatik, dei egiten dugu otsailaren leian Tolosan egingo den manifestazioan parte hartzera, AHTren inposizioak gizartearen ezezko biribila jaso dezan, ea horrekin lortzen dugun egitasmo hori geldiaraztea eta desarrollismoaren eragin ekologiko eta sozial suntsitzaileei aurre egiteko kapaz izango den gizarte bizitza orekatu eta aske bat berreraikitzearen alde egiten ari den borrokari bultzada bat ematea. AHTri emango zaion erantzun honetan jende guztiaren parte hartzea beharrezkoa da, zuzenki kaltetua den jendearengandik hasi, kultur elkarte, sindikatu, indar politiko, udal eta gizarte talde desberdinak bilduz, horrela baino ezingo baititu AHTrekiko oposizioak bere helburuak lortu: **AHT GELDITU! INPOSAKETARIK EZ!**

Deialdi honen berri zuen inguruan zabaltzea ere eskatzen dizuegu. Materiala eskuratu nahi baduzue (kartelak, esku-orriak, pegatinak) edota informazio gehiago lortzeko, harremanetan jar zaitezte.

**AHT GELDITU! ELKARLANA**

TLFNOAK: 650175085 (Tolosa) eta 657705677